

समा. 09.20 Hrs

Headlines

1. उपराज्यपाल मनोज सिन्हा होरें बडोदरा च “सरदार एट 150 युनिटी मार्च” च हिस्सा लैता ते राष्ट्र गी इक जुट करने च सरदार वल्लभ भाई पटेल हुंदी भूमिका गी उजागर कीता।
2. दिल्ली कार धमाके दी जारी जांच दे सिलसिले च एन.आई.ए नै जम्मू-कश्मीर ते उत्तर-प्रदेश च केंई थाहरें छापेमारी करियै ऐतराज जोग सामग्री बरामद कीती।
3. सी.बी.आई नै 35 बरे पुराने रुबड़या सैयद किडनैपिंग मामले च फरार शफकत अहमद शांगलू गी गिरफ्तार करी लैता ऐ- उसी हून टाडा अदालत च पेश कीता जाहग।
4. उत्तरी कमान अध्यक्ष Lt. Gen. प्रतीक शर्मा होरें छातरु ते बसंतगढ़ च आतंकवाद रोधी बवस्था ते कारवाइयें सरबन्धि तयारियें दा जायजा लैता।
5. ते जम्मू-कश्मीर उद्यमता विकास संस्थान जे.के.इ.डी.आई नै मिशन युवा तैहत 12 जिलें च सिखलाई लेई नमें बैच शुरू कीते न।

LG-Gujrat

उपराज्यपाल मनोज सिन्हा होर कल गुजरात दे वदोदरा च “सरदार एट 150 युनिटी मार्च” तैहत आयोजत पैदल यात्रा च शामिल होए ते राष्ट्रीय एकता ते राष्ट्र गी जोड़ने च सरदार पटेल हूंदी भूमिका गी उजागर कीता। “कश्मीर-हैदराबाद ते सरदार” विषय पर बोलदे होई एल.जी होरें

आखेया जे जिस्स चाल्ली सरदार पटेल होरें 1947 च लौहकी-लौहकी रयासतें च बंडोए दे भारत गी इक्क-जुट्ट करने दी जिम्मेदारी गी कायाबी कन्नै तोड़ चाढ़ेया ते जेकर इयां नैई होंदा तां जम्मू-कश्मीर दा इतिहास किश बक्खरा गै होना हा। मनोज सिन्हा होरें अग्गे आखेया जे पटेल हुंदा एकता- इकजुटता- बरोबरी ते समाजी न्यां आहली सोच ते नजरिया अज्ज बी भारत दी विकास यात्रा च बत्त दस्सने आहली इक लौ दा कम्म करा करदा ऐ। उन्नै गलाया जे प्रधानमंत्री नरेन्द्र मोदी हुंदियां पैहलकदमियां ते फैसलें जिंदे च दफा 370 गी खत्म करना ते “इक राष्ट्र” जनेह सुधारात्मक कदम शामिल न। देसै गी होर मजबूत बना करदे न।

<><><><><><>

NIA Searches

राष्ट्री जांच एजेंसी (एन.आई.ए) नै दिल्ली कार धमाके मामले दी जांच दे सिलसिले च जम्मू-कश्मीर ते उत्तर-प्रदेश च केंई थाहरें पर छापेमारी कीती। एन.आई.ए नै आखेया ऐ जे जम्मू-कश्मीर दे शोपिया- कुलगाम- पुलवामा ते अवंतीपोरा जिलें च कुल 8 थाहरें ते लखनऊ च इक थाहरें तुपाई कीती गई। एजेंसी नै आखेया ऐ जे दवें इलाकें च केंई आरोपियें ते संदिग्धें दे परिसरें च कीती गेदी तुपाई दौरान बक्ख-बक्ख डिजिटल उपकरण ते होर दूइयां आपत्तिजनक समग्ररी जब्त कीती गई ऐ।

<><><><><><>

केन्द्रीय जांच ब्यूरो (सी.बी.आई) नै 35एं बरें पुराने सी.बी.आई मामले च इक भगौड़े शफत अहमद शांगलू गी गिरफ्तार कीता ऐ। एह मामला साबका केन्द्री गृहमंत्री मुफ्ती मोहम्मद सईद हुंदी धीह रुबिया सईद दे अपहरण कन्नै जुड़े दा ऐ। आरोपियें कथित तौर पर यासीन मलिक ते होरनें कन्नै रलियै इस अपराध गी अंजाम देने दी साजिश रची ही। शफत अहमद पर 10 लख रुपे दा ईनाम रखेया गेदा हा। उसी कन्नूनी तौरा पर तय समें-सीमा दे अंदर-अंदर जम्मू दी टाडा अदालत च पेश कीता गया।

<><><><><><>

Sulai Honey

प्रधानमंत्री हुंदे “मन की बात” कार्यक्रम च रामबन दे सुलाए मक्खीर दा जिक्र करने कन्नै उसी राश्ट्री स्तर पर मान्यता हासल होआ रदी ऐ ते उसदी प्रमुखता बधदी जा करदी ऐ। जंगली फुल्लें थमां भौर दी मक्खियें आसेया पैदा कीते गेदे इस अनोखे मक्खीर गी हाल दे बरे च जी.आई. टैग बी दिता गया ऐ। इस मक्खीर दी बद्धी राश्ट्री ते अंतराश्ट्री मंग दे कन्नै करसानें दी आमदन च खासा बाद्दा होने- उंदी आजीविका गी समर्थन थोहने ते पूरे समाजी -आर्थिक विकास च योगदान गी बल मिलने दी मेद ऐ। आकाशवाणी समाचार कन्नै गल्ल करदे होई रामबन दे इक सुलाई मक्खीर उत्पादक आशिक हुसैन नै आखेया.

<><><><><><>

मुख्य सचिव अटल डुल्लु हारे जम्मू-कश्मीर च डेरी विकास गी बढ़ावा देने लेई तयार कीती गेदी नमी रुपरेखा दा जायजा लैता। इस मौके उन्हें राई-बाई ते एहदे कन्नै जुड़े दे क्षेत्रें दे पूरे पराते विकास सरबंधि एच.ए.डी.पी. (HADP) कार्यक्रम गी लागू करने दे कन्नो-कन्नी होरनें राज्यें दे कामयाब जतनें दा अध्ययन करने ते राश्ट्रीय डेरी विकास बोर्ड दी मदद लैने दी जरूरतें पर जोर दिता। मुल्खै च दुध उत्पादन दे क्षेत्र च जम्मू-कश्मीर 8में नम्बरें पर ऐ। बैठका च जानकारी दिती गई जे 2026 थमां शुरू कीती जा रदी 7 बरे दी योजना तैहत आधुनिक मुल्ल-श्रखला राएं 5 लख कोला मते करसानें गी जोड़ेया जाहग- जेहदे च दुध किट्ठा करने कोला लेइयै इसी पैक करने तोड़ी दी आधुनिक आटोमेटिड प्रक्रिया आहली बवस्था शामिल ऐ। सहकारिता ते FPO राए लागू कीती जा दी इस स्कीम दा मकसद करसानें दी औंदन च बाददा करना ते इस क्षेत्र च स्थिरता आहन्ना ऐ।

<><><><><><>

Army CMDR Visit

फौज दी उत्तरी कमान दे अध्यक्ष लैफ्टिनेंट जनरल प्रतीक शर्मा होरें छातरु ते बसंतगढ़ इलाके दा दौरा लाइयै उत्थे आतंकवाद रोधी बवस्था ते कारवाइयें सरबंधि तयारियें दा जायजा लैता। कमान अध्यक्ष होरें उत्थे तैनात कमांडरे कन्नै गल्लबात दौरान इलाके च रमानदारी बनाई रखने ते सुरक्षा गी होर निगगर बनाने लेई नीतिगत उपाए पर चर्चा कीती। लैफ्टिनेंट जनरल शर्मा होरें इलाके च दपरेश चुनौतियें दा कामयाबी कन्नै मकाबला ते कुशल नेतृत्व करने लेई उंदी सराहना कीती। उन्हें उत्थे तैनात जोआनें दी हिम्मत-दलेरी ते समर्पण भाव दी बी सिफ्त कीती। जम्मू-

कश्मीर गी आतंकवाद दे खतरे कोला पूरी चाल्ली मुक्त बनाने दे धेड़यै गी फही पक्का करदे होई उनें पूरी चाल्ली सौहगा- सतर्क रौहने ते नमीं टैक्नालोजी दा पूरा इस्तेमाल करने पर बी जोर दिता।

<><><><><><>

JKEDI

जम्मू-कश्मीर उद्यम विकास संस्थान JKEDI नै मिशन युवा तैहत 12एं जिले च उद्यम विकास कार्यक्रम दे नमें बैचें दी शुरुआत कीती। इस पैहल दा मकसद नौजवानें गी उद्यमता-कौशल कन्नै लैस करना ते उनेंगी अपने टिकाऊ ते औंदनबख्श युनिट खड़ेने च मदद करना ऐ। उदघाटन सत्रें दा सरिस्ता JKEDI दे जम्मू- कठुआ- रियासी- उधमपुर- अनंतनाग- पुलवामा- शोपिया- बांडीपोरा- बडगाम- गांदरबल- कुलगाम ते बारामुला केन्द्रें च कीता गया। उत्थे दिती जाने आहली सिखलाई च बपार योजना- माली साक्षरता ते बजार-सम्पर्क शामिल ऐ। इस चाल्ली दे कार्यक्रमें दे आयोजन कन्नै उद्यमी नौजवानें तगर पुज्ज जकीनी बनदी ऐ ते JKEDI भविक्ख च इस चाल्ली दे होर बैच शुरु करने दी योजना बना करदा ऐ। एहदे च हिस्सा लै करदे नौजवानें इस पैहल पर संदोख प्रगट करदे होई JKEDI दा आभार ते धन्नवाद प्रगट कीता ऐ।

<><><><><><>

जम्मू-कश्मीर सिङ्क ट्रांस्पोर्ट कारपोरेशन (जे.के.आर.टी.सी) नै जम्मू च इक निवेशक बैठक दा आयोजन कीता जेदे च मुकामी ते इलाकाई निवेशकें हिस्सा लैता। आर.टी.सी. दियां सचिव अवनि लवासा- प्रबंध निदेशक अब्दुल रशीद वार ते सीनियर ऐहलकारें इस कार्यक्रम च हिस्सा लैता ते 6 बड्डी परियोजनाएं पर चर्चा कीती। मीडिया कन्नै गल्लबात करदे होई अवनि लवासा होरें दस्सेया जे इस पैहलकदमी आस्तै सांझ-भ्याली महत्वपूर्ण ऐ- जेहदा मकसद आर.टी.सी दी माली हालत गी बढ़ावा देना- निजी निवेश गी आकर्षित करना ते केन्द्र शासित प्रदेश दे नौजवानें लेई रोजगार दे मौके पैदा करना ऐ। इस पैहलकदमी कन्नै जम्मू-कश्मीर च सार्वजनिक ट्रांस्पोर्ट सेवाएं च सुधार आस्तै आधुनिकीकरण- टिकाऊ विकास ते सैहयोग विकास पर बी ध्यान दिता गया ऐ।

<><><><><><>